


Leximet biblike



E hënë, 18 maj 2020 – Leximet biblike.

KRISHTI U NGJALL!

APOSTULLI – Veprat e Apostujve 12:12-17.

Edhe pasi u mendua me vete, erdhi në shtëpinë e Marisë, të ëmës së Joanit që mbiquhej Mark, ku ishin mjaft veta mbledhur dhe po luteshin. Edhe kur trokiti ai në portën e avllisë, erdhi një shërbëtore që quhej Roda, për të dëgjuar. Edhe kur njohu zërin e Pjetrit, nga gëzimi nuk hapi portën, po shkoi me vrap brenda e lajmëroi se Pjetri po rri përpara portës. Edhe ata i thanë asaj: Shkallove. Po ajo këmbëngulte se kështu është. Edhe ata thoshnin se është engjëlli i tij. Por Pjetri vazhdonte të trokiste, dhe si hapën derën, e panë atë dhe u mahnitën. Po ai u bëri atyre shenjë me dorë të mos bëjnë zë, e u tregoi si e nxori Zoti nga burgu. Dhe tha: Lajmëroni Jakovin dhe vëllezërit për këto. Edhe doli e shkoi në vend tjetër.

* * * * *

UNGJILLI – Joani 8:42-51.

Jisui pra u tha atyre: Po të ishte Perëndia ati juaj, do të më donit; sepse unë prej Perëndisë dola, edhe prej atij erdha; sepse nuk erdha prej vetes sime, po ai më dërgoi. Pse nuk njihni të folurit tim? Sepse nuk mund të dëgjoni fjalën time. Ju jeni prej atit tuaj, djallit, edhe doni të bëni dëshirat e atit tuaj. Ai ishte që në fillim

njerivrasës, edhe nuk qëndron në të vërtetën; sepse të vërtetë nuk ka tek ai. Kur flet gënjeshtër, flet nga të tijat; sepse është gënjeshtar, edhe i ati i saj, i gënjeshtër. Po mua, sepse them të vërtetën, nuk më besoni. Cili prej jush më qorton për mëkat? Po në them të vërtetën, pse s'më besoni ju? Ai që është prej Perëndisë, fjalët e Perëndisë dëgjon; prandaj ju nuk dëgjoni, sepse nuk jeni prej Perëndisë.

Judenjtë pra, u përgjigjën e i thanë: A nuk themi mirë ne se ti je samaritan, edhe demon ke? Jisui u përgjigj: Unë demon s'kam, po nderoj Atin tim, edhe ju më çnderoni. Dhe unë s'kërkoi lavdinë time; është ai që kërkon e që gjykon. Me të vërtetë, me të vërtetë po ju them juve, në ruajtë ndonjë fjalën time, nuk do të shohë vdekje për gjithë jetën.

[Kisha Orthodhokse Autoqefale e Shqipërisë/facebook](#)